

starogradski

OPĆINA STARI GRAD  
SARAJEVO



MUNICIPALITY OF STARI  
GRAD SARAJEVO

# haber

BESPLATAN PRIMJERAK ● mart, 2018. broj 37.

**Trebevićka žičara  
ponovo u funkciji**

## Projekti

## Sadržaj

- 4 Počeo voziti Centrotrans
- 5 Žičara - simbol grada
- 8 Senzorna soba Zavoda Mjedenica
- 10-11 Komunalna infrastruktura
- 14 Aktivnosti Centra za unapređenje zdravlja
- 18 Pekara Poričanin -kultno mjesto Starog Grada



## Impressum

- Izdavač:** Općina Stari Grad Sarajevo
- Tiraž:** 2.000
- Pripremi:** Almedina Porča  
Alma Imamović  
Nedim Šahović
- DTP:** Safet Mališević
- Fotografije:** Safet Mališević
- Foto naslovna:** Haris Karamehmedović
- Štampa:** "Pentagram" d.o.o.
- Adresa:** Zelenih beretki br. 4  
71000 Sarajevo
- web:** www.starigrad.ba
- e-mail:** info@starigrad.ba
- Tel./fax:** +387 33 282 385  
+387 33 217 916



## Za dvije godine otvoreno šest dječijih igrališta, do kraja godine još dva terena

**Ugovoreni radovi za izgradnju sportskog terena na Mihrivodama • Gradit će se košarkaški teren na Kovačima • U planu i moderna sportska sala OŠ "Edhem Mulabdić"**

**U**nastojanjima da riješi problem nedostatka dječijih igrališta u Starom Gradu, Općina Stari Grad je pokrenula aktivnosti na njihovoj izgradnji i obnovi u proteklom periodu, a samo u posljednje dvije godine otvoreno je šest novih dječijih igrališta.

Kroz program „Jačanje uloge mjesnih zajednica u BiH“, građani su putem Savjeta mjesnih zajednica predlagali projekte koji su realizovani u njihovim naseljima. Tako su na Mošćanici, Sedreniku, Širokači i Vratniku izgrađena

dječija igrališta sa gumenom i pješčanom podlogom, potpuno opremljena dječijim mobilijarom: klackalicama, vrtuljcima, toboganima, ljuljaškama, penjalicama. U izgradnju ovih igrališta uloženo je preko 88.000 KM, a sredstva su osigurali Vlade Švicarske i Švedske – kroz program „Jačanje uloge mjesnih zajednica u BiH“ i Općina Stari Grad.

### Vrtić "Pčelica" dobio igralište sa drvenim mobilijarom

Osim toga, ispred Doma kulture Logavina izgrađeno je i opremljeno dječije igralište za mališane iz ovog naselja, dok je na Vratniku novo igralište dobio vrtić „Pčelica“. Naime, prošle godine je općinski Sektor za lokalni razvoj uspješno realizovao saradnju sa firmom „KuKuk -Kultur.de“ iz Štutgarta koji su donirali i dopremili iz Njemačke potrebni mobilijar. Za izgradnju su se pobrinuli volonteri – srednjoškolci iz Njemačke koji su radove završili za sedam dana i poklonili mališanima sa Vratnika novo igralište sa drvenim mobilijarom.

Iako je u Starom Gradu evidentan problem nedostatka prostora za izgradnju

### Igralište na Vratniku u dvorištu osnovne škole

Novosagrađeno igralište na Vratniku ima prostor za igru djece sa pješčanom podlogom, te zelenu površinu sa klupama za odmor. Prostor je ograđen metalnom ogradom, a u unutrašnjosti je prateći mobilijar sa drvenom kućicom i mrežom za penjanje, ljuljaškom, klackalicama, vrtuljkom, njihalicama u obliku konjića i motocikla i dr.



Igralište ispred OŠ "Vrhbosna"



Na Sedreniku izgrađeno igralište u ulici Brdovita

dječijih igrališta, Općina Stari Grad nastavit će sa ovakvim aktivnostima, kako bi mališani iz ove općine imali što više prostora za igru i zabavu. Pritom, pažnja će se posvećivati i višim uzrastima, a u tom smislu već je rađena sanacija školskih igrališta i sala, dok je za OŠ "Mula Mustafa Bašeskija" prošle godine izgrađena nova, moderno opremljena sportska sala čija vrijednost je oko 800.000 KM. Sportska sala gradit će se i za OŠ "Edhem Mulabdić" u ulici Konak, i to sredstvima kredita Saudijskog fonda za razvoj, a vrijednost tog projekta iznosi oko dva miliona KM.

### Na Mihrivodama se gradi teren za mali fudbal, košarku i rukomet

Ugovoreni su radovi na izgradnji modernog sportskog terena za mali fudbal, košarku i rukomet na Mihrivodama, u neposrednoj blizini Tekstilne škole. Nedovoljan broj sportskih terena na području općine Stari Grad Sarajevo, umanjuje mogućnost za bavljenje sportom djece i omladine. Bez odgovarajućeg prostora za igru i trening nema razvoja sporta, a tereni kao što je ovaj predstavljaju sportsko naslijeđe koje ostaje

budućim generacijama, kao podsticaj za dalje bavljenje sportom.

Na pomenutoj lokaciji na Mihrivodama nalazi se staro, oštećeno igralište koje će biti srušeno i na njegovom mjestu sagrađeno novo. Projekat izgradnje sportskog terena 'Bijela bašča' predviđa formiranje sportske plohe za mali nogomet, košarku i rukomet dimenzija 30 x 16,30 metara, a izgradnju će finansirati pobratimska Općina Fatih iz Istanbula, Općina Stari Grad i Federalno Ministarstvo kulture i sporta. Projekat koji je pripremio Sektor za lokalni razvoj, vrijedan je oko 130.000 KM, a s obzirom da je već završena procedura izbora izvođača radova, gradnja će početi čim se poboljšaju vremenski uslovi.



Igralište kod vrtića Pčelica

### Uskoro košarkaški teren na Kovačima

Na Kovačima, u ulici Nadmolini, bit će izgrađen košarkaški teren. Na ovoj lokaciji ranije je izvršeno čišćenje ostataka ruševina i izgrađen kaskadni potporni zid, a ove godine se planira izgradnja terena za košarku. Uskoro će biti raspisana procedura izbora najpovoljnijeg izvođača radova, a projekat će finansirati Općina Stari Grad i UNDP.

## Kolumna



# U Starom Gradu počeo voziti Centrotans

**Normalizacija minibuskog saobraćaja očekuje se do kraja maja kada će Centrotans preuzeti sve linije**

**N**ačelnik Općine Stari Grad Ibrahim Hadžibajrić održao je sastanak sa direktorom firme Centrotans Safudinom Čengićem i njegovim saradnicima, povodom sve teže situacije po pitanju gradskog prevoza u Starom Gradu.

Kako ovaj problem ne jenjava, a građanima je sve teže nositi se sa neredovnim ili nikakvim gradskim prevozom u padinskim dijelovima, pokrenute su aktivnosti u iznalaženju konačnog rješenja. Sva ranija nastojanja Općine Stari Grad da pomogne preduzeću „Gras“ u uspostavljanju redovnih linija, nisu urodila plodom.

## Zahtjev KUIP-u i Ministarstvu saobraćaja

Općinski načelnik uputio je zahtjev nadležnom Ministarstvu saobraćaja Kantona Sarajevo kojim se traži da zbog neredovnog održavanja linija Kantonalna Uprava za inspeksijske poslove utvrdi režim redovnosti održavanja minibuskih linija na području općine Stari Grad u prethodnom registracionom periodu. Potom, od Ministarstva se traži da izvrši registraciju modifikovanih redova vožnje, u skladu sa općinskim prijedlozima, na kompaniju Centrotans Eurolines, koja ima poslovne referense za uredno održavanje ovoga prevoza.

U međuvremenu, Centrotansu je dat nalog da od petka, 30.marta, preuzme dvije linije u Starom Gradu i omogući građanima redovan prevoz. Tog jutra u 06,00 sati Centrotansova vozila bila su na linijama Bašćaršija-Obhodža-Faletići i Latinska čuprija-Mahmutovac.

Nakon što se nadležno ministarstvo očituje po pitanju zahtjeva koje je uputila Općina Stari Grad bit će održan još jedan sastanak na kojem će biti definisane sve linije na kojima će voziti Centrotans, te utvrđeni redovi vožnje.

## Hadžibajrić: Građani ne smiju biti taoci pogrešne politike

Prema procjenama i preliminarnim dogovorima, Centrotans bi do kraja maja

mogao uspostaviti redovno funkcionisanje gradskog saobraćaja u padinskim dijelovima Starog Grada. Od nadležnog ministarstva bit će zatraženo da se uredi zakonska regulativa po pitanju troškova, odnosno kupona koje građani koriste. Dotad, građani će moći koristiti postojeće kupone i u vozilima Centrotansa.

„Ne želim više da naši građani budu taoci pogrešnih politika ili lošeg poslovanja, kao što ne želim više ni da pišu peticije i u 21. vijeku traže osnovna ljudska prava kao što je gradski prevoz. Ako naše potrebe ne može zadovoljiti postojeće preduzeće, onda zahtijevamo od Ministarstva saobraćaja i Vlade KS da dozvoli Centrotansu da vozi naše građane,“ izjavio je Hadžibajrić.



*Minibus spreman za vožnju na Mahmutovac*

# Trebevićka žičara

- simbol Sarajeva i Starog Grada ponovo u funkciji

Svečano puštena u rad na Dan grada Sarajeva, 06. aprila • Ustupljen prostor Vidikovca na korištenje na 25 godina • Žičaru će koristiti pola miliona ljudi godišnje

**T**rebevićka žičara, ili uspinjača kako su je mnogi znali zvati, vratila se Sarajevu i Starom Gradu nakon 26 godina, a prve vožnje za građane i turiste počele su na Dan grada – 06. aprila. Nakon toliko godina, naši građani i turisti konačno ponovo mogu sjesti u čuvenu Trebevićku žičaru i odvesti se do „pluća Sarajeva“ – prelijepe planine Trebević, a za vrijeme te vožnje Sarajevo posmatraju „kao na dlanu“.

Ideja o revitalizaciji Trebevićke žičare pojavila se odmah nakon rata, ali zbog neriješenih imovinsko-pravnih odnosa i značajnih finansijskih sredstava koja su bila potrebna za obnovu, na to se ipak čekalo dugi niz godina. U aprilu 2016. godine zvanično je počela obnova Trebevićke žičare.

Općina podržala realizaciju projekta

Općina Stari Grad oduvijek je isticala svoje opredjeljenje i podršku za realizaciju ovog projekta.

U prethodnom periodu, sve općinske službe stavljene su u funkciju obezbjeđivanja potrebne dokumentacije za izgradnju Trebevićke žičare, a prema nalogu općinskog načelnika Ibrahima Hadžibajrića ti zahtjevi tretirali su se kao prioritetni, te su se rješavali u roku od sedam dana. Pokrenuta je procedura i izmijenjeni su regulacioni planovi, izdata je potrebna dokumentacija – urbanističke i građevinske dozvole, a u rekordnom roku je završena ekspropijacija nekretnina za polazne i dolazne stanice – oko 30 parcela. Podrška projektu Trebevićke žičare nije bila samo u administrativnom smislu, već i finansijskom. Općina Stari Grad uplatila je u decembru prošle godine pola miliona konvertibilnih maraka za izgradnju Trebevićke žičare, a nakon toga je Gradskoj upravi dodijelila na korištenje prostor Vidikovca na period od 25 godina – bez naknade. Gradskoj up-



*Nakon 26 godina žičara ponovo u funkciji*

ravi dodijeljen je kompletan prostor Vidikovca površine 1.750m<sup>2</sup>.

Trebevićka žičara – nekad najveća u regionu

Prvobitna Trebevićka žičara izgrađena je 1959. godine, povezivala je Bistrik na 583 metra nadmorske visine sa Vidikovcem, smještenim na 1.160 metara na Trebeviću. Sa dužinom od 2.100 metara, Trebevićka žičara u to vrijeme bila je najveća u regionu, vožnja je trajala oko 12 minuta, a imala je oko 50 kabina. Trebevićka žičara je potpuno uništena tokom rata i opsade Sarajeva.

Sadašnja instalacija žičare ima 33 kabine kapaciteta 10 osoba, vozit će brzinom od pet metara u sekundi, što znači da će vožnja trajati oko sedam minuta, a od polazne stanice ima 10 velikih stubova. Po riječima inženjera i graditelja, sajla, vučno i noseće uže, kao i zračni kabl (koji služi za komunikaciju između brdske i dolinske stanice) su najbolje kvalitete. Očekivanja su da će žičaru koristiti oko pola miliona korisnika godišnje. U projekat je uloženo blizu 15 miliona KM.



*Za izgradnju žičare Općina izdvojila 500.000 KM*

## Općinsko vijeće

### 14. sjednica

#### Općinskog vijeća

Općinsko vijeće Stari Grad održavat će i u 2018. godini redovne sjednice jednom mjesečno, a radi raspravljanja i odlučivanja o pitanjima predviđenim Programom rada, te drugim pitanjima zavisno od aktuelne situacije i potreba i interesa građana. Sve navedeno, uz detaljan pregled planiranih akata, odluka i izvještaja usvojeno je 14. sjednici Općinskog vijeća. Usvojen je i izvještaj o radu prema kojem je u 2017. godini održano 11 redovnih sjednica, te po jedna tematska, vanredna i svečana.



Usvojen program rada OV

Općinsko vijeće Stari Grad usvojilo je i politiku investiranja raspoloživih novčanih sredstava Općine Stari Grad Sarajevo za 2018. godinu. Za investicionog menadžera Općine imenovan je Općinski načelnik mr. Ibrahim Hadžibajrić.

Na sjednici je prihvaćen Prijedlog zaključka o davanju saglasnosti Općinskom načelniku za zaključenje Sporazuma o saradnji sa Distriktom 1, Bukurešt u Rumuniji. Usvojena je inicijativa kojom se od nadležne službe traži da ponudi alternativnu zamjensku lokaciju za izmještanje strelišta sa Pašinog brda, a u dogovoru sa klubom koji djeluje na toj lokaciji.

### 15. sjednica

#### Općinskog vijeća

Formiranjem Organizacionog odbora za obilježavanje Dana Općine Stari Grad, te Komisije za dodjelu priznanja, na 15. sjednici Općinskog vijeća Stari Grad, zvanično su počele pripreme za obilježavanje 02. maja, Dana Općine. Organizacioni odbor će utvrditi program obilježavanja Dana Općine, a Komisija će odlučiti kome će tog dana biti dodijeljena priznanja: općinska povelja sa zlatnim štitom, povelja sa grbom Općine, Zlatni sebilj i policajac godine.



Formiran organizacioni odbor

Po hitnom postupku na dnevni red uvršten je Prijedlog odluke o utvrđivanju javnog interesa za izvođenje radova vanjskog uređenja donje stanice Trebevičke žičare. Ovaj Prijedlog usvojen je jednoglasno od strane starogradskih vijećnika. Kako je pojasnila Muhterema Kugić, šefica Odsjeka za imovinsko-pravne poslove radi se o rekonstrukciji postojećeg prilaznog stepeništa na donjoj stanici Trebevičke žičare. Na dnevnom redu je bila i Informacija KJKP „Gras“ o minibuskom saobraćaju. Zaključak vijeća je da će najkasnije za 20 dana biti održana tematska sjednica OV u vezi sa kombi prevozom u Starom Gradu. Osim toga vijećnici su se usaglasili da će tražiti pismeno izjašnjenje menadžmenta GRAS-a da li mogu za građane Starog Grada pružati usluge kombi prevoza.

### 16. sjednica

#### Općinskog vijeća

Općinsko vijeće Stari Grad na redovnoj 16. sjednici je, između ostalog, usvojilo zaključak kojim se predlaže da se Zakonom o udžbenicima Kantona Sarajevo, koji je utvrđen u formi Nacrta, propiše da su udžbenici za učenike svih osnovnih škola, besplatni. U tom slučaju, Općina Stari Grad spremna je sufinansirati nabavku udžbenika za svoje osnovce, do 20% ukupnih sredstava potrebnih za ove namjene. Prema iznesenim procjenama, za udžbenike osnovaca iz Starog Grada trebalo bi se na godišnjem nivou izdvajati oko 300.000 KM. Prijedlog je da Ministarstvo obrazovanja Kantona Sarajevo vrši nabavku udžbenika i dostavlja ih osnovnim školama koje će iste davati na korištenje učenicima.

Vijeće je usvojilo i prijedlog odluke o raspodjeli budžetskih sredstava za rad boračkih udruženja u ovoj go-



Usvojen zaključak o besplatnim udžbenicima

dini. Ukupno 100.000 KM iz budžeta bit će raspoređeno na pet udruženja: Udruženje "Savez boračkih Organizacija – Udruženja i ABNOR-a" Općine Stari Grad Sarajevo, Organizacija porodica šehida i poginulih boraca, Udruženje dobitnika ratnih priznanja i odlikovanja, Udruženje "RVI Općine Stari Grad" i Udruženje "Bosnae-Zelene beretke". Sredstva su raspoređena na osnovu javnog poziva raspisanog prošlog mjeseca.

Prijedlog Strategije održivog razvoja turizma Općine Stari Grad 2018-2022. također je usvojen. Strategija razvoja održivog turizma usmjerava razvoj i definiše prioritete u razvoju turizma na području općine. Izvještaj o radu Pravobranilaštva Općine Stari Grad Sarajevo za 2017. godinu nije usvojen, a prijedlozi odluka o priznavanju uloženi sredstava za šest poslovnih prostora vraćeni su na doradu.

## Štićenici Doma Bjelave gosti na 14. sjednici Općinskog vijeća



*Mališani dobili prigodne poklone*

Štićenici Doma za djecu bez roditeljskog staranja – Bjelave, bili su gosti 14. redovne sjednice Općinskog vijeća Stari Grad. Predvođena vaspitačicama Almirom Kambur i Samirom Puzo, grupa od 15-ak djece sjedila je u vijećničkim klupama i prisustvovala početku sjednice.

Prema riječima predsjedavajućeg Općinskog vijeća Stari Grad Jusufa Pušine, pozvali su ih kako bi im pokazali da brinu i misle o njima. „Zapamtite,

djeco: Najlakše je biti čovjek, ali mnogi to nikad ne postignu! U ime Općinskog načelnika i Općinskog vijeća želimo vam da budete sretni u životu i budete nosioci progresivnih ideja, da jednog dana vi pomazete drugima, kao što drugi danas pomazu vama, „ poručio je Pušina. Šefovi klubova stranaka koje djeluju u Općinskom vijeću Stari Grad uručili su mališanima prigodne slatke poklone, u znak sjećanja na ovu posjetu.

## Dio šetnice uz Miljacku nosi ime hadži hafiza Halida ef. Hadžimulića



Dio šetnice uz lijevu obalu rijeke Miljacke, na potezu od Carevog mosta do mosta Ćumurija, nazvan je po uglednom sarajevskom učenjaku hadži hafizu Halidu ef. Hadžimuliću.

Inicijativu o davanju ovog naziva dijelu šetnice uz Miljacku usvojilo je Općinsko vijeće Stari Grad Sarajevo na svojoj četvrtoj redovnoj sjednici i uputilo je u redovnu proceduru. Potom je Skupština Kantona Sarajevo donijela

odluku o davanju naziva dijela šetnice na području općine Stari Grad Sarajevo. Inicijativa je potekla od vijećnika Općinskog vijeća Stari Grad Almedina Miladina. „Na 4. sjednici Općinskog vijeća podnio sam inicijativu o davanju naziva dijela šetnice uz Miljacku po najcjedenijem islamskom učenjaku u Bosni i Hercegovini. Zaista sam ponosan što je dio šetnice nazvan po hadži hafizu Halidu ef. Hadžimuliću“, kazao je Miladin.

## Ulica na Bistriku nosi ime šehida Muhameda Basare



*Tabla sa imenima sedam šehida*

Ulica u starogradskom naselju Bistrik, u blizini Gazi Mehmed-begove džamije i Bistričke česme, odnedavno nosi naziv po šehidu Muhamedu Basari. Istovremeno, pored table sa nazivom ulice postavljena je i tabla sa imenima sedam šehida iz ovog naselja koji su dali svoje živote za odbranu grada i države i ukopani su pored Gazi Mehmed-begove džamije.

Odluku o izmjeni naziva ulice, odnosno preimenovanju, donijela je Skupština Kantona Sarajevo, a na inicijativu Savjeta Mjesne zajednice Bistrik i Udruženja „Organizatori i pokretači otpora“ Stari Grad, koju je podržalo Općinsko vijeće Stari Grad.

Svečanom otkrivanju ploča sa nazivom ulice i imenima šehida prisustvovali su članovi Udruženja „Organizatori i pokretači otpora“ Stari Grad, „Zelenih beretki“, „Bosne 22“, porodica i brojni građani.

Prema riječima Basarine sestre, Nermine, njen brat poginuo je na padinama Trebevića, u 21. godini života, a među prvima se stavio u odbranu zemlje. „Bio je lijep i pametan momak, brzo je živio i volio je svoju raju, Sarajevo i porodicu. Rekla bih da je za te svoje tri ljubavi dao život.“ kazala je Nermina. Dodala je da njeni roditelji nisu dočekali ovaj dan, ali da bi zasigurno bili ponosni, kao što je i ona.



*Besara poginuo u 21. godini života*

Pobratimska Općina Umranije finansirat će nabavku hemodijaliznog aparata za UKCS



*Sporazum o saradnji potpisan 2013. godine*

Istanbulska Općina Umranije, zahvaljujući pobratimskim vezama sa Općinom Stari Grad, finansirat će projekat nabavke hemodijaliznog aparata, čija je vrijednost 23.400 KM.

Riječ je o projektu kojeg je, na osnovu inicijative Udruženja dijaliznih i transplantiranih pacijenata Kantona Sarajeva i uz saglasnost općinskog načelnika Ibrahima Hadžibajrića, pripremio Sektor za lokalni razvoj Općine Stari Grad.

Načelnik ove istanbulske Općine Hasan Džan odobrio je finansiranje projekta, te je njegovu odluku potvrdilo i Općinsko vijeće Umranije. Općina Stari Grad će u skladu sa zakonskim propisima nabaviti hemodijalizni aparat i uručiti ga Klinici za hemodijalizu Univerzitetskog kliničkog centra u Sarajevu.

Općina Stari Grad i Općina Umranije uspostavile su pobratimske odnose potpisivanjem Sporazuma o saradnji još 2013. godine.

## Dom zdravlja Stari Grad dobija novi UZV aparat

Dom zdravlja Stari Grad dobit će novi ultrazvučni aparat čime će biti unaprijeđena primarna zdravstvena zaštita za pacijente s područja Starog Grada.

Nabavku aparata sa oko 42.000 KM finansirat će Vlada Japana, dok će Općina Stari Grad sa oko 7.000 KM finansirati troškove PDV-a. Kazuya Ogawa, ambasador Japana u BiH rekao je kako je Dom zdravlja Stari Grad osnovan davne 1968. godine, te da je jedini centar primarne zdravstvene zaštite u Općini Stari Grad. „Vjerujemo da će s nabavkom novog UZV aparata, čija je vrijednost oko 21.000 eura, biti poboljšana kvalitet medicinskih pregleda u Domu zdravlja Stari Grad“, naglasio je Ogawa. Podsjetio je kako se Vlada Japana još od 1996. godine fokusirala na pružanje podrške u oblasti poboljšanja zdravstvene zaštite u BiH.

## Projekti

# Općina će opremiti senzornu sobu Zavoda Mjedenica



## Poboljšana terapija za 220 korisnika Zavoda Mjedenica ● Soba će imati elemente koji pomažu stimulaciju osjetila

Općina Stari Grad finansirat će opremanje senzorne sobe u Zavodu Mjedenica za provođenje terapije za osobe s poremećajem senzorne integracije.

Ova terapija se provodi na svih 220 korisnika Zavoda Mjedenica, a očekuje se da u naredna dva mjeseca opremanje bude završeno. Ugovor o finansiranju opremanja sobe, u vrijednosti od 21.000 KM, potpisali su načelnik Općine Stari Grad Ibrahim Hadžibajrić i direktorica Zavoda Mjedenica Mirsada Čakal.

### Terapija pogodna za djecu i odrasle s autizmom

Ovaj vid terapije pogodan je za djecu i odrasle sa autizmom, poremećajem koncentracije, osobe sa senzornim oštećenjima, mentalnom i nedovoljnom razvijenošću, govornim poteškoćama, smetnjama u učenju kao i one sa problemima u ponašanju.

Direktorica Zavoda Mjedenica Mirsada Čakal kazala je da je Općina Stari Grad ranijih godina pomagala provođenje ovakvih terapija, ali da je bilo potrebno potpuno opremanje senzorne sobe da bi ona radila punim kapacitetom.

„Senzorna soba je posebno opremljena soba koju koriste osobe koje imaju

poremećaj senzorne integracije. Unutar te sobe imaju priliku da istraže i da razviju svoje senzorne vještine. Ovaj vid terapije se koristi u radu s djecom s poteškoćama u razvoju i ima veliki značaj. Zahvaljujući podršci Općine imaćemo senzornu sobu sa različitim elementima koji pomažu stimulaciju osjetila kao što su vid, sluh, dodir, miris i okus,“ kazala je Čakal.

### Poboljšanje rada Zavoda

Prema riječima općinskog načelnika Ibrahima Hadžibajrića, sredstva za senzornu sobu namjenski su planirana u ovogodišnjem budžetu kako bi se korisnicima Zavoda omogućila kvalitetna terapija. „Shvatili smo kroz razgovor sa osobljem Zavoda Mjedenica da je potrebna kompletna rekonstrukcija senzorne sobe i u budžetu smo predvidjeli sredstva za to. Drago mi je što ćemo im olakšati rad, a korisnicima Zavoda omogućiti da imaju kvalitetnu terapiju koja im može pomoći u poboljšanju njihovog stanja,“ kazao je Hadžibajrić.



*Stičenici zavoda bili gosti Općinskog vijeća*





## „Alumni Prve bošnjačke gimnazije“ – projekat Općine i Prve bošnjačke gimnazije

**Povezivanje, protok informacija, ostvarivanje saradnje • Baza podataka sa zanimanjima, mjestu boravka, vlastitom biznisu i sl. • Institucionalno djelovanje na uvezivanju i prepoznavanju uspješnih mladih ljudi**

**P**rva bošnjačka gimnazija predstavila je projekat „Alumni Prve bošnjačke gimnazije“ koji je finansirala Općina Stari Grad Sarajevo. Program „Alumni Prve bošnjačke gimnazije“ predviđa umrežavanja učenika, diplomanata Prve bošnjačke gimnazije, a ima za cilj široko povezivanje, ostvarivanje i očuvanje kontakata, protok informacija i saradnju na različitim poljima struke, zanimanja i poslova. U okviru projekta zvanično počela je sa radom i web aplikacija „Alumni Prve bošnjačke gimnazije“.

### Interes učenika za saradnjom i uvezivanjem

Kako je istakla direktorica Prve bošnjačke gimnazije Naida Hota-

Muminović, tokom dvadeset i dvije godine obrazovno-odgojnog rada, koliko već djeluje Prva bošnjačka gimnazija u Sarajevu, bosanskohercegovačkom društvu je vratila preko dvije hiljade mladih ljudi koji su proces srednjeg obrazovanja prošli i završili u njoj.

„U posljednje vrijeme postoji sve veći interes, zahtjevi i inicijative bivših učenika, danas već uspješnih i afirmiranih stručnjaka u različitim oblastima u zemlji i u svijetu, koji žele čvršću međusobnu povezanost, poslovnu suradnju i razmjenu iskustava, a posebno žele surađivati i pomoći svojoj gimnaziji/srednjoj školi, njenim sadašnjim i budućim učenicima. Cijeneći ovaj interes, zahtjeve vremena u kome živimo, kao i potrebe škole i njenih bivših i sadašnjih učenika a na tragu svjetskih, savremenih, pozitivnih praksi kao i dobrih iskustava organizovanja i umrežavanja, pokrenut je program „Alumni Prve bošnjačke gimnazije u Sarajevu“, kazala je direktorica Hota-Muminović.

### Općina podržala projekat u punom kapacitetu

Sporazum o finansiranju ovog projekta u iznosu od 14.320 KM potpisali su sredinom februara načelnik Općine Stari Grad Ibrahim Hadžibajrić i direktorica Prve bošnjačke gimnazije Naida Muminović-Hota. Prema riječima Hadžibajrića, ovo je institucionalno djelovanje na uvezivanju i prepoznavanju uspješnih mladih ljudi i istovremeno zapošljavanju onih kojima je to potrebno.

„Općina je odlučila da u punom kapacitetu podrži projekat, ne samo zato što se Prva bošnjačka gimnazija nalazi na našoj teritoriji, nego i zato što smatramo da nam je potrebno ovakvo institucionalno rješenje prema kojem ćemo imati cjelovitu sliku naših srednjoškolaca i onoga što su postigli po završetku srednje škole. Istovremeno drugima ćemo omogućiti da se sa njima uvežu i ostvaruju saradnju,“ kazao je tom prilikom Hadžibajrić.

Za podršku ovom projektu Prva bošnjačka gimnazija je dodijelila zahvalnicu načelniku Općine Stari Grad Ibrahimu Hadžibajriću. U ime načelnika Hadžibajrića zahvalnicu je preuzela Aida Bajramović, šef Službe kabineta načelnika. Bajramović je još jednom ponovila opredjeljenje općinske administracije, predvođene načelnikom Hadžibajrićem, da ulaže u obrazovanje mladih generacija kroz obrazovne institucije, jer jedino tako možemo odgajati uspješne generacije mladih ljudi.

### Pretraživanje baze i razmjena informacija

Alumnisti će moći pretraživati bazu po različitim kriterijima: Spisak alumnista po zanimanju i djelatnosti u kojoj su zaposleni, Spisak alumnista po mjestu boravka, Spisak alumnista koji imaju vlastiti biznis, Spisak alumnista angažiranih u nevladinom sektoru. Alumnisti mogu razmjenjivati informacije kako bi unaprijedili kvalitet svog studija, daljeg stručnog usavršavanja, poslovne saradnje...



Hadžibajrić i Hota-Muminović

## Infrastruktura

# Komunalna infrastruktura: sanirane ulice, kanalizaciona mreža, potporni zidovi

**Maksimalno korišteni povoljni vremenski uslovi za radove širom Starog Grada**

**R**adovi na sanaciji i rekonstrukciji komunalne infrastrukture u Općini Stari Grad odvijali su se i u prethodnim mjesecima, bez obzira na zimski period. Povoljni vremenski uslovi iskorišteni su za izgradnju nekoliko potpornih zidova, te rekonstrukcije kanalizacione mreže, dok su s prvim proljetnim danima počeli i veliki radovi rekonstrukcije ulica Čemerlina i Glodina.

## Čemerlina

U toku su radovi na sanaciji ulice Čemerlina, u mjesnoj zajednici Logavina. Projektom sanacije, čiju realizaciju finansira Općina Stari Grad Sarajevo sa oko 29.000 KM, bit će obuhvaćen dio od broja 18 do stepeništa. Kako je planirano projektom, prvo će biti uklonjen stari asfalt i tamponska podloga, te izvršena demontaža oštećenih dijelova ivičnjaka. Nakon toga slijedi nasipanje novog tamponskog sloja dužine 85 metara, te sanacija oštećenih dijelova trotoara kojeg čine kameni ivičnjaci.

## Glodina

U ulici Glodina rješava se problem fekalne i kišne kanalizacije, te dotrajalog asfalta. Radovi se izvode na dionici od spoja sa ulicom Čemerlina do nove fiskulturne sale OŠ „Mula Mustafa Bašeskija“, te od sale do ulice Toromanova. Bit će zamijenjeno 116 metara kanalizacionih cijevi tipa 300 mm i 33 metra cijevi tipa 200 mm, planirana je i izgradnja šest novih šahtova, te rekonstrukcija postojećih priključaka. Nakon zamjene separatne kanalizacije, pristupit će se izdizanju vodovodnih šibera i slivnih rešetki na potrebnu visinu, postavljanju novog tampona, ravnanju terena i asfaltiranju ulice u dužini od oko 160 metara. Radovi koštaju preko 100.000 KM.

## Trčivode

Općina je po hitnom postupku izvršila sanaciju i otklanjanje kvara na



Čemerlina



Glodina



Ticina



Terzibašina

kanalizacionoj mreži u naselju Trčivode. Podsjećamo, na ovoj lokaciji došlo je do kvara na kanalizacionoj cijevi, zbog neadekvatnog i nelegalnog priključka. Nakon prijave građana na teren su izašle nadležne službe Općine Stari Grad. „Zbog neadekvatnog priključka došlo je do začepjenja i izljevanja fekalija niz padinu ulice Trčivode, prema stambenim objektima. Općina je hitno poduzela aktivnosti da sanira kvar na kanalizacionoj mreži i čim su to vremenske prilike dozvolile radovi su izvedeni“, potvrdili su iz Službe za komunalne poslove Općine.

Kazali su kako je na potezu od 12 metara zamijenjena stara kanalizaciona cijev i postavljena dva nova šahta. Za ove radove Općina je izdvojila 7.000 konvertibilnih maraka.


## Terzibašina

Sanirana je kaldrma na Toki - Džeki, u ulici Terzibašina broj 3. Na površini od oko 50 metara kvadratnih zamijenjena je stara, oštećena kaldrma, uz prethodno urađenu podlogu i gazište.

Stari, neoštećeni kamen je zadržan, a dijelom je zamijenjen novim.

## Novi rukohvati na raskršću ulica Bistrik i Bakarevića

Na raskršću ulica Bistrik i Bakarevića postavljena je nova rukohvatna ograda dužine 12 metara. Rukohvatna ograda postavljena je na jedno od najprometnijih stepeništa koje povezuje glavni izlaz/ulaz na ulice Bistrik i Bakarevića. Ovim je olakšano kretanje svim građanima, a najviše starijim osobama i djeci.



Domaćinstvima koja se nalaze u ovoj ulici sada je osiguran mnogo lakši pristup i neometan prolaz kroz ulicu.

Radovi su koštali oko 6.000 KM, a izvela ih je firma Klico trans gradnja.

## Ticina

Urađena je obnova kaldrme u ulici Ticina, u mjesnoj zajednici Medrese.

Popravka je podrazumijevala sanaciju gazišta koje je dotrajalo i obrušavalo se. S obzirom da ovo stepenište vodi do ulaza u kuće i građani ga svakodnevno koriste, Općina je odlučila uraditi njegovu sanaciju. Izvođač radova u ovom projektu bila je firma „Klico trans gradnja“ iz Sarajeva, a sanaciju sa oko 7.000 KM finansirala je Općina.

## Gričića brdo

U toku je sanacija kamene kaldrme u ulici Gričića brdo. Za ove radove iz budžeta Općine Stari Grad za 2018. godinu izdvojeno je oko 11.700 KM. Sanirat će se kameno gazište površine oko 60 metara kvadratnih. U toku je postepeno uklanjanje stare kaldrme, postavljanje nove tamponske podloge, te armirane mreže, nakon čega će uslijediti kaldrmisanje tj. postavljanje novog kamena. Nakon sanacije kretanje ovom lokacijom bit će znatno olakšano,



Gričića brdo



Nadmlini

## Bakije sokak

Rekonstrukcija separatne kanalizacione mreže i dijela vodovodne mreže u ulici Bakije sokak, na Sumbuluši je u toku. Za ovaj projekat Općina Stari Grad je izdvojila 134.000 konvertibilnih maraka.

U ulici će biti postavljena nova separatna kanalizaciona mreža (fekalna i oborinska) u dužini od oko 80 metara, a uradit će se i nova vodovodna mreža s novim kućnim priključcima. Postavljen primarni sistem za vodu kako snabdijevanje domaćinstava ne bi bilo ugroženo tokom izvođenja radova.

pogotovo u zimskom periodu. Izvođač radova u ovom projektu je firma Klico trans gradnja iz Sarajeva.

## Bistrik basamac

Izgrađen je novi armirano-betonski potporni zid u ulici Bistrik basamac. Radove je finansirala Općina Stari Grad u iznosu od 6.000 KM.

Ranije je utvrđeno da je postojeći zid dosta oštećen i nagnut, zbog čega više nije imao funkciju sprječavanja klizanja tla. „Nakon uklanjanja starog zida, izgrađen je novi dužine 12 metara i prosječne visine od 2,5 metra.“, pojasnili su iz Službe za investicije, plan i analizu Općine. Izgradnjom novog potpornog zida riješeni su problemi obrušavanja terena za lokalno stanovništvo čiji se objekti nalaze u neposrednoj blizini.



Bistrik basamac



Paje br 34

## Hošin brijeg i Čeljigovići

Rekonstruisana je kanalizaciona mreža na dijelu ulica Hošin brijeg i Čeljigovići, a stari kanalizacioni sistem zamijenjen je novim u dužini od 141 metar. Kanalizacioni sistem koji je ranije bio postavljen u ovoj ulici je bio dotrajao. Često su se dešavala začepjenja, zbog čega je dolazilo do poplava. Sa novim sistemom povećan je kapacitet cjevovoda, čime su riješeni problemi ove ulice. Izvođač radova je bila građevinska firma „Mibral“. Projekat je koštao 36.150 KM, a finansirala ga je Općina Stari Grad.

## Nadmlini

Novi kameni potporni zid, dužine 12 metara izgrađen je u ulici Nadmlini, u mjesnoj zajednici Kovači. „Radovi su se izvodili postepeno, jer se radi o dosta nepristupačnom terenu. Većina radova se morala izvoditi ručno, jer je na lokaciji veliki nagib“, istakli su iz Službe za investicije, plan i analizu. Na ovoj lokaciji postojao je stari kameni zid, koji je bio dotrajao i počeo se obrušavati. S obzirom da se pored nalazi stepenište, kojeg koristi veliki broj građana, bilo je neophodno izgraditi novi zid. Projekat izgradnje novog zida s oko 7.000 KM finansirala je Općina.

## Paje br. 34

Saniran je potporni zid u ulici Paje broj 34, u mjesnoj zajednici Mahmutovac. Projekat je podrazumijevao iskop, betoniranje i armiranje zida. Riječ je o zidu iznad saobraćajnice. Zid je dotrajao i postojala je opasnost od njegovog obrušavanja, čime bi bila ugrožena i saobraćajnica i kuće koje se nalaze iznad zida. Projekat je koštao oko 7.000 KM, a radove je finansirala Općina.

## Uskoro sanacija stepeništa koje vodi do Olimpijskog muzeja



**Za projekat izdvojeno 45.000 KM**

Općina Stari Grad izdvojiti će 45.000 KM za rekonstrukciju i uređenje stepeništa u ulici Niže banje, koje vodi do Olimpijskog muzeja Sarajevo.

Potpisan je sporazum sa Gradom Sarajevo, prema kojem će ove dvije institucije radove finansirati u jednakim omjerima. Rekonstrukcija stepeništa radit će se kako bi mu se vratio prvobitni izgled i funkcionalnost, s obzirom da se procjenjuje da će upotreba stepeništa uskoro – po završetku obnove zgrade Olimpijskog muzeja, biti mnogo veća, kako od strane građana, tako i brojnih turista.

Stepenište u ulici Niže banje se prostire od ulice Dženetića čikma, do Petrakijine i dugo je 42 metra. Što se tiče same zgrade Muzeja, obnovljena je unutrašnjost, krov i prozori, a preostala je posljednja, treća faza.

## Sanirano oštećenje krova osnovne škole na Hridu

Oštećenje ravnog krova iznad ulaznog hola JU OŠ „Šejh Muhamed ef. Hadžijamaković“ koji je bio u dosta lošem stanju, sanirano je prije početka drugog polugodišta, a radove je finansirala Općina Stari Grad.

Kako je pojasnio direktor škole Kerim Fejzagić često je dolazilo do prokišnjavanja ovog dijela ravnog krova škole pa je čak bio i otežan prolaz učenicima i uposlenicima na pojedinim dijelovima hola što je otežavalo i samo izvođenje nastavnog procesa.

„Škola se obratila za pomoć nadležnom kantonalnom ministarstvu i Općini Stari Grad. Iz Općine su odmah reagovali, kako bi učenicima bilo osigurano neometano pohađanje nastave u ovom polugodištu“, kazao je Fejzagić. „Svi učenici, njihovi roditelji i uposlenici škole izražavaju veliku zahvalnost Općini Stari Grad i načelniku Ibrahimu Hadžibajriću na ovoj pomoći i pravovremenom reagovanju“, kazao je direktor Fejzagić.

## Projekti

# Nastavlja se podrška Župnom uredu Katedrale



**Načelnik Hadžibajrić obišao prostorije Župnog ureda**

Općina Stari Grad izdvojila je sredstva u iznosu od 8.500 KM za sufinansiranje radova na zamjeni unutrašnje stolarije Župnog ureda pastoralnog centra Katedrala.

„Nastojimo postepeno dovesti u red cijeli Župni ured, što je nužno za njegovo redovno funkcionisanje. U tome nam znatno pomaže Općina Stari Grad i neizmerno smo zahvalni načelniku Ibrahimu Hadžibajriću,“ izjavio je prilikom potpisivanja ugovora župnik Marko Majstorović. Dodao je da se dobra saradnja sa Općinom Stari Grad ne ogleda samo u finansijskoj podršci, nego i kroz

druge projekte i župna događanja, na čemu su zahvalni i župljani i Župni ured.

Namjera je u ovoj godini uraditi zamjenu unutarnje stolarije u objektu kako bi dobili adekvatniji prostor za svoj rad, a istovremeno postigli i uštedu energije. Radovi bi trebali početi u martu.

Prošle godine Općina Stari Grad sufinansirala je uređenje višenamjenske dvorane u sklopu Župnog ureda pastoralnog centra Katedrala, koji se nalazi u starogradskoj ulici Josipa Štadlera br.2. Ovaj sada potpuno novi, izmijenjeni prostor koristi se za arhiv, održavanje konferencija, časova pjevanja i sl.

## Općina sufinansira projekat Saborne crkve

Općina Stari Grad sufinansira radove unutar Saborne crkve u Sarajevu iznosom od 8.500 KM.

Općina je i ranije podržavala projekte i rad Saborne crkve, a prije četiri godine izdvojena su sredstva za sanaciju balkona unutar objekta. „Ove godine izdvojili smo finansijska sredstva za finansiranje projekta izrade i ugradnje drvenog mobilijara u oltaru Saborne crkve u Sarajevu“, kazao je općinski načelnik Ibrahim Hadžibajrić.

Kako je pojasnio protojerej Stupar radi se o posebnoj izradi mitropolitske stolice u oltaru.

„Do sada smo imali privremeni mobilijar. Obratili smo se Općini da nam fi-

nansijski pomogne i sufinansira projekat, tako da ćemo uskoro imati novu posebno izradenu mitropolitsku stolicu u oltaru“, pojasnio je Stupar.



**Stupar i Hadžibajrić**



## Počele sa radom adaptirane prostorije MZ Mošćanica

Krajem marta zvanično su počele sa radom adaptirane prostorije Mjesne zajednice Mošćanica, inače najveće i najbrojnije mjesne zajednice u Starom Gradu. Usluga koja se pruža građanima u ovim prostorijama sada je kvalitetnija, kao i uslovi rada za sekretare, ali i članove Savjeta mjesne zajednice.

U adaptiranim prostorijama građani će moći predavati različite zahtjeve upućene općinskim službama ili drugim nivoima vlasti, peticije ili inicijative. U mjesnoj zajednici građani će moći preuzimati kućne liste, određene vrste uvjerenja, te predavati zahtjeve za prijavu na evidenciju stanovnika mjesne zajednice. Osim toga, adaptirane prostorije omogućit će redovna održavanja zborova građana i druga okupljanja, kao i održavanje lokalnih i općih izbora, te izbora za Savjet mjesne zajednice.

### Nova stolarija, podovi, namještaj...

Upravo je Savjet mjesne zajednice Mošćanica prepoznao potrebu za ovim projektom, te ga je u saradnji sa sekretarom MZ-a i općinskim Sektorom za lokalni razvoj kandidovao za program "Jačanje uloge mjesnih zajednica u BiH". Program finansiraju vlade Švicarske i Švedske, a implementira UNDP u BiH i zahvaljujući njemu u posljednje dvije godine je u Starom Gradu realizovano niz projekata: izgrađena četiri dječija igrališta, sani-

rane ulice, opremljen informatički kabinet itd. U mjesnoj zajednici Mošćanica urađena je kompletna adaptacija prostorija, uz zamjenu unutrašnje i vanjske stolarije, podova, krečenje i uređenje svih prostorija, rekonstrukciju mokrih čvorova, zamjenu vodovodnih i kanalizacionih instalacija, te nabavku novog namještaja. Projekat koštao je oko 35.000 KM.

### Godišnje primi oko 3.000 građana

Mjesna zajednica Mošćanica primila je prošle godine skoro 3.000 građana, u istom periodu održano je devet sastanaka Savjeta mjesne zajednice i tri zbora građana. U njenim prostorijama djeluju i Planinarsko društvo Mošćanica, Udruženje građana penzionera sa Mošćanice, FK Mošćanica, a smješten je i punkt Policijske uprave Stari Grad.



## Sanirane prostorije mjesnih zajednica

Općina Stari Grad finansirala je adaptaciju prostorija mjesnih zajednica Bašćaršija, Mjedenica, Mahmutovac i Hrid - Jarčedoli. Mjesne zajednice su prva karika u lancu komunikacije građana sa općinom i važno je osigurati adekvatne uslove za rad u njima. Samo u prošloj godini mjesne zajednice u Starom Gradu primile su preko 20.000 građana i pružile im neku od usluga. Općina Stari Grad ima 16 mjesnih zajednica, dio njih je adaptiran kroz ovaj projekat, a dio kroz program „Jačanje uloge MZ-a u BiH“.

### Mahmutovac i Mjedenica



MZ Mahmutovac

Na Mahmutovcu je zamijenjena dotrajala stolarija, urađena sanacija podova, postavljen laminat, urađeno krečenje svih prostorija, te postavljen itison. Zanatsko-građevinski radovi izvedeni su i u Mjesnoj zajednici Mjedenica. Postavljen je novi stakleni portal, urađene pregrade, te krečenje prostorija. Ove radovove realizovala je firma „Vindi tip“.

### Bašćaršija i Hrid - Jarčedoli



MZ Hrid-Jarčedoli

U Mjesnoj zajednici Bašćaršija zamijenjena je dotrajala stolarija, a preostala ofarbana, urađeno krečenje svih prostorija, te zamjena itisona. I u Mjesnoj zajednici Hrid - Jarčedoli urađeni su molerski radovi u svim prostorijama, te izrađene željezne zaštite na svim otvorima objekta. U ove dvije mjesne zajednice radove je izvodila firma „Librag“.

## Podrška

# Uspješno poslovanje općinskog Centra za promociju i unapređenje zdravlja

**Općina Stari Grad Sarajevo obezbijedila je prostor za djelovanje Centra te nabavila opremu i mobilijar u vrijednosti od 70.000 KM**

**T**erapijske vježbe tri puta sedmično za skoro 500 korisnika, fizikalni programi sa preko 1.500 provedenih procedura, medicinsko savjetovalište korišteno više od 1.000 puta, te skoro 300 aktivnih korisnika – samo su neki od rezultata koje je Centar za promociju i unapređenje zdravlja postigao u prvih sedam mjeseci rada.

Prezentacija rezultata, kao i planova za buduće djelovanje održana je u Općini Stari Grad, a o realizovanim projektima govorio je predsjednik Udruženja „Generacija“ Mahir Selmanović. Inače, „Generacija“ realizuje sadržaje u Centru za promociju i unapređenje zdravlja, a koji je osnovala Općina Stari Grad. U nastojanjima da unaprijedi život osoba treće životne dobi, Općina Stari Grad je, putem Sektora za lokalni razvoj, prošle godine pokrenula aktivnosti na otvaranju prvog centra ovakve vrste u Kantonu Sarajevo. Važnost ovog Centra je i u tome što je on otvoren za sve građane Kantona Sarajevo, a ne samo građane općine Stari Grad. Općina je obezbijedila prostor za djelovanje Centra, te nabavila opremu i materijal u vrijednosti od oko 70.000 KM.

## Prevencijom do zdravlja

U mjesnoj zajednici Babića bašča u toku je program „Prevencijom do zdravlja“ koji je

Namijenjen stanovnicama starosne dobi 50 i više godina s mjesnih područja Babića bašča, Bistrik i Hrid – Jarčedoli.

## Memorandum o saradnji

Udruženje „Generacija“, koje upravlja Centrom za promociju i unapređenje zdravlja Stari Grad, potpisalo je memorandum o saradnji sa Udruženjem za zaštitu mentalnog zdravlja „Menssana“, s ciljem pružanja podrške i unapređenja mentalnog zdravlja građana svih dobnih skupina.



Centar ima više od 300 aktivnih članova

Kroz projekat, koji će trajati pet mjeseci, bit će organizovan program preventivne zdravstvene zaštite kroz korektivno-preventivne vježbe, zdravstveno savjetovanje s posebnim akcentom na internu medicinu, te organizovane edukativne radionice o zdravoj ishrani s ciljem prevencije pretilosti.

Projekat „Prevencijom do zdravlja“ odobren je u sklopu programa „Jačanje uloge MZ u BiH“ koje u saradnji sa Općinom Stari Grad, implementira UNDP u BiH, a finansiraju vlade Švicarske i Švedske. Vrijednost projekta, kojeg je pripremio Sektor za lokalni razvoj je oko 9.100 KM, te će ga donator finansirati sa oko 6.400 KM, a Općina Stari Grad sufinansirati sa oko 2.700 KM. Implementator projekta „Prevencijom do zdravlja“

je Udruženje za unapređenje i promociju zdravlja „Generacija“.

## Djeca iz vrtića „Pčelica“ učila o zdravoj ishrani

Centar za promociju i unapređenje zdravlja Stari Grad proveo je u okviru projekta „Živjeti zdravo“ radionicu za najmlađe polaznike vrtića „Pčelica“ u cilju podizanja svijesti o zdravom i pravilnom načinu ishrane. Kako bi se zaobišao trend „nezdrave i brze“ ishrane i ukazalo na značaj zdravog i kvalitetnog odgoja u prehrani, organizovana je radionica sa stručnim osobljem u kojoj su djeca i roditelji učestvovali u pripremanju zdravih obroka.

## Dijabetološka ordinacija na točkovima

Kompanija Pharma Maac d.o.o. je od 25. marta do 8. aprila u saradnji sa austrijskim brendom Wellion, upriličio jedinstveni, zdravstveni, društveno - odgovorni projekat koji je imao za cilj širenje svijesti o dijabetesu, te njegovo preveniranje. Na značaj „Wellion Prve dijabetološke ordinacije na točkovima“ ukazao je i sam načelnik Općine Stari Grad, Ibrahim Hadžibajrić, koji je za primjer drugima, kao prvi odgovorni građanin, izmjerio vrijednosti šećera u krvi.



Načelnik uručio ruže za Dan žena

## Općina Stari Grad stipendira 221 učenika i studenta iz porodica boračke populacije

Općina Stari Grad izdvojila je ove godine 200.000 KM za stipendije učenicima i studentima iz porodica boračke populacije u školskoj 2017/2018. godini.

Obraćajući se stipendistima, Općinski načelnik Ibrahim Hadžibajrić je kazao:

„Za stipendiranje naših učenika i studenata u posljednjih devet godina izdvojili smo oko dva miliona konvertibilnih maraka i namjeravamo nastaviti u tom smjeru, jer je to ulaganje u njihovu budućnost. Pored djece iz porodica boračke populacije, mi stipendiramo i izrazito nadarene učenike i studente, te one koji odluče izučavati stare i deficitarne zanate.“

Konkurs za stipendiranje učenika i studenata, raspisala je Služba za boračko-invalidsku i socijalnu zaštitu Općine Stari Grad, a prijavilo se 310 kandidata. Nakon provedene procedure, dodijeljena je 221 stipendija: 109 za srednjoškolce i 112 za studente.

### Mladost i znanje su neprocjenjivo bogatstvo

Potpisivanju ugovora prisustvovao je i predsjedavajući Općinskog vijeća Stari Grad Jusuf Pušina i njegov zamjenik Sanel Dragolovčanin, te pomoćnica načelnika za boračko-invalidsku i zdravstvenu

zaštitu Općine Safija Šehović.

„U samom nazivu stipendija kaže se kome one pripadaju. Djeci onih ljudi koji su stali u odbranu BiH da bi mi i naredne generacije živjeli u miru“, kazao je Pušina. „Mladost i znanje su neprocjenjivo bogatstvo, a vjerujem da ste vi budući naučnici, profesori, ministri, ugledni i obrazovani ljudi. Nadam se da ćete i vi narednim generacijama obezbijediti stipendije da bismo nastavili ovu tradiciju,“ dodao je Pušina.

Jedna od korisnica stipendije je i Amina Grebo, studentica Pedagoškog fakulteta.

„Stipendija mi mnogo znači za studiranje, prvenstveno jer sam treća završna godina i ove godine imamo samo praksu u vrtićima“, izjavila je Amina, studentica treće godine Pedagoškog fakulteta u Sarajevu.



Za stipendije izdvojeno 200.000 KM

## Općina se uključila u projekat „Obrok za sve“

Humanitarna organizacija Pomozi.ba u sklopu projekta „Obrok za sve“ od 2015. godine pomaže najugroženije članove naše društvene zajednice. Broj korisnika raste iz godine u godinu i na dnevnoj bazi aktivisti Pomozi.ba pomažu 300 osoba. U realizaciju humanog projekta „Obrok za sve“ uključila se i Općina Stari Grad donacijom sredstava za nabavku obroka.

Adnan Tatarević, predsjednik Udruženja Pomozi.ba i Fahrudin Solak, projekt menadžer posjetili su Općinu gdje ih je ugostio načelnik Ibrahim Hadžibajrić. Kako je kazao Tatarević željeli su lično doći u Općinu i zahvaliti se načelniku na pomoći i podršci. „Realizacija ovog i ostalih projekata ne bi bila moguća bez donatora i dobrih ljudi koji

izdvajaju sredstva ili namirnice kako bi se svaki dan pripremilo najmanje 300 obroka za korisnike kojima to bude jedini obrok tokom dana“, kazao je Tatarević. Korisnici projekta „Obrok za sve“ su stari, bolesni i iznemogli, socijalno ugroženi ljudi koji ne mogu samostalno doći ni do javne kuhinje.



Općina podržala projekat Pomozi.ba

## Za rad Narodne kuhinje grant od 40.000 KM



Općina izdvojila 40.000 KM

Delegacija Općine Stari Grad posjetila je Narodnu kuhinju povodom 26. godišnjice rada ovog udruženja, a tom prilikom je općinski načelnik Ibrahim Hadžibajrić potpisao sa upraviteljicom Narodne kuhinje Zilhom Šeta ugovor o izdvajanju godišnjeg granta u iznosu od 40.000 KM za finansiranje rada ovog udruženja.

Načelnik Hadžibajrić je istakao da ga žalosti činjenica da Narodna kuhinja s godinama ima sve više korisnika, umjesto da se taj broj smanjuje.

„Općina Stari Grad je bila prva općina koja je 1992. godine pomogla da se formira Narodna kuhinja i kao što vidite ona i dan danas radi, a njena vrata otvorena su i korisnicima van Kantona Sarajevo. Nažalost, korisnika ima sve više. Mi kontinuirano izdvajamo sredstva na godišnjem nivou za podršku radu kuhinje, a ove godine ćemo za te namjene izdvojiti 40.000 KM,“ kazao je Hadžibajrić.

Prvi obrok u Narodnoj kuhinji spremljen je prije 26 godina, 27. marta 1992. godine za potrebe stanovnika tada opkoljenog grada, što se uzima kao zvaničan datum formiranja Narodne kuhinje „Stari Grad“.

## Zimovanje osnovaca na Igmanu

Učenici OŠ „Edhem Mulabdić“ tokom zimskog raspusta uspješno su završili školu skijanja na Igmanu, gdje je im bilo omogućeno i zimovanje, uz brojne sadržaje prilagođene njihovom uzrastu. Zimovanje učenika organizovala je Općina Stari Grad, putem Službe za obrazovanje, kulturu i sport, a učenicima je osiguran prevoz, smještaj i boravak na Igmanu, obroci, te škola skijanja. U projekat je bilo uključeno 50-ak učenika iz OŠ „Edhem Mulabdić“.

Kako bi im boravak na planini bio što zanimljiviji, učitelji koji su pratili djecu i predstavnici nadležne službe organizovali su im tematske večeri: karaoke, kvizove, društvene igre, kino večeri i drugo.

## Sportske strane

# U toku proljetni dio sportske sezone 2017/2018 za osnovce iz Starog Grada

Nastavljena su sportska takmičenja učenika svih šest osnovnih škola iz Starog Grada. Poznati su šampioni odbojkaške i šahovske lige za sezonu 2017/2018, a uvedene su i lige u stonom tenisu i košarci, dok fudbalska liga počinje u aprilu.

## Fudbalska liga Starog Grada

Najstarije, ali i najpopularnije ligaško takmičenje osnovaca u Starom Gradu, fudbalska liga, održava se po četvrti put, a proljetni dio prvenstva počinje polovinom aprila u Centru za mali fudbal Bentbaša. Nakon pet vrlo zanimljivih kola jesenjeg dijela, najbolje rezultate je zabilježio aktuelni šampion OŠ „Hamdija Kreševljaković“ i tako ima veliku priliku da odbrani titulu ovog proljeća. Priključak na tabeli drže OŠ „Edhem Mulabdić“ i OŠ „Mula Mustafa Bašeskija“, te i oni imaju šansu postati šampioni za sezonu 2017/2018. Pored borbe za titulu, na proljeće će se voditi borba i za odličje najboljeg strijelca lige. Najviše golova su postigli Faruk Dalipagić (OŠ „Mula Mustafa Bašeskija“) i Hajrudin Miftari (OŠ „Edhem Mulabdić“) po pet golova, ali tu je i mnogo kandidata sa četiri pogotka.



Zanimljiva borba za titulu na proljeće

1	OŠ „Hamdija Kreševljaković“	5	4	1	0	10:1	13
2	OŠ „Edhem Mulabdić“	5	3	1	1	14:4	10
3	OŠ „Mula Mustafa Bašeskija“	5	3	0	2	10:7	9
4	OŠ „Vrhbosna“	5	1	1	3	3:10	4
5	OŠ „Šejh Muhamed ef. Hadžijamaković“	5	1	1	3	3:13	4
6	OŠ „Saburina“	5	1	0	4	7:12	3

## Odbojkaška liga Starog Grada

Okončana je i treća sezona Odbojkaške lige Starog Grada. Najbolje rezultate su postigle mlade odbojkašice iz OŠ „Hamdija Kreševljaković“ i to nakon dvije godine dominacije ekipe OŠ „Šejh Muhamed ef. Hadžijamaković“. Svi mečevi su se igrali u novoizgrađenoj sportskoj sali OŠ „Mula

Mustafa Bašeskija“, gdje se pružaju najbolji mogući uslovi za bavljenje sportom. Prvenstvo je bilo izuzetno zanimljivo, a pobjednik je odlučen u posljednjem 10. kolu kada je OŠ „Hamdija Kreševljaković“ savladala sa 2:0 drugoplasiranu ekipu OŠ „Mula Mustafa Bašeskija“ i time sebi

osigurala naslov. Za najuspješnije aktere takmičenja Općina Stari Grad je obezbijedila bogat nagradni fond. Svečana dodjela nagrada će se organizovati u maju mjesecu u okviru proslave Dana Općine Stari Grad. Tehnička organizacija je i ove godine pripala Odbojkaškoj akademiji „Smeč“.

	EKIPA	UTAKMICE		SETOVI		POENI		BODOVI
		POB.	IZG.	POB.	IZG.	DOB.	IZG.	
1	OŠ „Hamdija Kreševljaković“	10	0	20	1	517	304	20
2	OŠ „Mula Mustafa Bašeskija“	7	3	15	6	491	328	15
3	OŠ „Saburina“	5	5	11	11	440	462	11
4	OŠ „Vrhbosna“	4	6	9	12	410	448	9
5	OŠ „Šejh Muhamed ef. Hadžijamaković“	4	6	8	14	395	484	9
6	OŠ „Edhem Mulabdić“	0	10	1	20	303	506	1



## Košarkaška liga Starog Grada

Nakon što je Košarkaški klub i Škola košarke BBY (Bosnian Basket Youth)



Ekipa OŠ „Šejh Muhamed ef. Hadžijamaković“

oformio tri košarkaške selekcije Starog Grada za kantonalno takmičenje, gdje su postignuti solidni rezultati, polovinom marta osnovana je i prva Košarkaška liga osnovaca Starog Grada uz pomoć ovog kluba i Općine Stari Grad. Za ambasadore ove lige imenovani su poznati bh košarkaši Džanan Musa, Sani Čampara i Njegoš Sikiraš, koji imaju dobru saradnju sa KK BBY. Ekipe čine učenici i učenice od I do V razreda.

Igra se jednokružni sistem pravilima prilagođenim za uzrast djece. Radi se o službenim mini basket pravilima FIBE. Smanjena je veličina terena, postavu čine pet igrača, visina koša je 270 cm, a vrijeme jedne četvrtine 10 minuta. Mečevi se igraju subotama, što omogućuje velikom broju ljudi da prisustvuju ovom premijernom takmičenju u Starom Gradu. Dosad su odigrana dva kola, a stanje na tabeli je sljedeće:

1	OŠ „Šejh Muhamed ef. Hadžijamaković“	2	2	0	54:36	4
2	OŠ „Edhem Mulabdić“	2	2	0	25:23	4
3	OŠ „Mula Mustafa Bašeskija“	2	1	1	45:44	3
4	OŠ „Hamdija Kreševljaković“	2	1	1	40:49	3
5	OŠ „Saburina“	2	0	2	35:38	2
6	OŠ „Vrhbosna“	2	0	2	28:37	2

## Šahovska liga Starog Grada

Šampion druge sezone Šahovske lige Starog Grada je ekipa OŠ „Vrhbosna“ koji su uspjeli zadržati bodovnu prednost koju su ostvarili na jesen. Drugo mjesto je pripalo OŠ „Edhem Mulabdić“, a treće OŠ „Šejh Muhamed ef. Hadžijamaković“. Boje pobjedničke ekipe su branili Danis Fejzić, Ajdin Tatlić, Abdulah Išerić, Lamiya Česko, Ajdin Šahović, Dženan Ljuca i Adelaida Pušilo.

Nagrade najuspješnijim ekipama i učesnicima bit će dodijeljene u maju kada tradicionalno počinju Dani Općine Stari Grad. Uz pokroviteljstvo Općine, takmičenje je organizovao Šahovski klub „Stari Grad“, a svoje prostorije za odigra-

vanje mečeva je ustupila OŠ „Hamdija Kreševljaković“.

1	OŠ „Vrhbosna“	33,5
2	OŠ „Edhem Mulabdić“	29,5
3	OŠ „Šejh Muhamed ef. Hadžijamaković“	19,5
4	OŠ „Saburina“	12,5
5	OŠ „Hamdija Kreševljaković“	10,5
6	OŠ „Mula Mustafa Bašeskija“	10



OŠ "Vrhbosna" šampion

## Stonoteniska liga Starog Grada

Od prošle jeseni, sportske lige osnovaca Starog Grada su bogatije za još jedno takmičenje, i to za ono u stonom tenisu. U toku prošle godine Općina Stari Grad je obezbijedila po dva stola sa pratećom

opremom svakoj od šest osnovnih škola, uključujući i Zavod Mjedenicu, a za tu namjenu je izdvojila oko 15.000 KM. Tako su škole bile u mogućnosti organizovati stonoteniske sekcije i odabrati najbolje za ovu premijernu sezonu. Tehnički organizator Stonoteniske lige osnovaca Starog Grada je SK „SPIN“ čiji

se rad odvija pod rukovodstvom Sudijske organizacije stonoteniskog saveza BiH i Amele Hadžijamaković, selektorice Juniorske reprezentacije BiH. Mečevi se igraju utorkom u OŠ „Saburina“, a ekipe su sastavljene od učenika i učenica. Do kraja je ostalo još dva kola, a najbliže tituli je ekipa OŠ „Vrhbosna“.

1	OŠ „Vrhbosna“	8	8	0	24:3	16
2	OŠ „Šejh Muhamed ef. Hadžijamaković“	8	6	2	22:11	12
3	OŠ „Mula Mustafa Bašeskija“	8	6	2	20:13	12
4	OŠ „Saburina“	8	2	6	8:21	4
5	OŠ „Hamdija Kreševljaković“	8	1	7	12:21	2
6	OŠ „Edhem Mulabdić“	8	1	7	7:22	2



Premijerno takmičenje

Predstavljamo uspješne male privrednike iz Starog Grada

# Pekara Poričanin kultno mjesto Starog Grada

**Rijetki su oni koji nisu probali somune pekare Poričanin, kojih dnevno znaju napraviti i do 3.000 • I bez vode i struje u ratu se pravio hljeb za vojsku i stanovništvo • Hotel na Kovačima nosi ime majke, voljene i brižne žene**

U ovom broju donosimo vam priču o porodičnoj tradiciji staroj više od devedeset godina. Početak te tradicije je mala pekara na Bašćaršiji, koju je iznajmio Muharem Poričanin još davne 1923. Ta pekara je omogućila da se odnjeguje i podigne porodica od četrnaest članova, koja nastavlja tradiciju koju je Muharem počeo graditi. Nastavljajući tradiciju, izgradili su hotel, posvećen onoj čije ime nosi, ime majke, voljene i brižne žene, Mehmedove Azize.

Iako vrlo skromno prihvata da je na čelu najpoznatije pekare u Sarajevu, Mehmed Poričanin to objašnjava činjenicom da su pekare poput njegove nažalost nestale kroz vrijeme, te se prisjeća kako je počela pekarska priča porodice Poričanin: „Još od dječaćkih dana imam dodir sa ovim poslom jer sam odrastao s amidžom koji je još davne 1923. godine otvorio svoju prvu pekaru. Uzimao je u najam prostore, prvo kod tunela na Bistriku, pa je prešao na Goricu, zatim u ulicu Kračule, da bi 1953. konačno došao do svoje radnje u kojoj smo i dan danas“.

## Hljeb tepsijaš i kukuruza

Zbog specifičnih životnih okolnosti, bolesti amidže i strine, koji su vodili posao, Mehmed je još u veoma ranoj dobi preuzeo brigu nad pekarom, napustio studije i potpuno se posvetio pekarskom poslu, za što se nikada nije pokajao. „Prvobitni pekarski proizvodi su bili vrlo prosti, samo hljeb i kukuruza. U



*Proizvodnja nekad i do 3000 somuna dnevno*

ovoj pekari smo počeli proizvoditi hljeb tepsijaš, po čemu smo bili vrlo poznati. A naš današnji najpoznatiji proizvod somun se masovnije počeo proizvoditi tek pojavom ćevabdžija na Bašćaršiji“, kazao je Poričanin, te je posebno istakao proizvodnju ramazanskog somuna i atmosfere koju donese taj sveti mjesec. „Ramazan u potpunosti promijeni našu proizvodnju u pekari, većina našeg rada je posvećena somunima, a svi znaju za redove ispred naše pekare uoči iftara“ ponosno govori Poričanin, te dodaje da posebnog recepta u pravljenu somuna apsolutno nema, jedini recept je potpuna posvećenost i ljubav prema tom poslu. Zahvaljujući toj posvećenosti, odličnoj lokaciji, dobroj saradnji sa ćevabdžijama i kupcima, pekara Poričanin je nekad u stanju proizvesti i prodati oko 3.000 somuna dnevno: „Kad znate da se svaki somun pravi ručno, stavlja u pećnicu i vadi nakon samo jedne minute, postaje jasno koji je obim tog posla“, riječi su Mehmeda Poričanina.

## U ratu napravili preko tri miliona komada hljeba

Mehmed Poričanin se nerado prisjeća tog teškog ratnog perioda, ali ipak sa ponosom govori o ulozi svoje pekare u ta doba: „Već u maju 1992. godine Armija RBiH je zatražila da pravim hljeb za njih. I pored katastrofalnih uslova, stalnog nedostatka vode i struje, nas nekoliko ovdje je napravilo i podijelilo vojsci i stanovništvu preko tri miliona komada hljeba za vrijeme rata. Ti uslovi su skoro pa u potpunosti upropastili pekaru“.

Već od 2001. godine posao polako počinju preuzimati Mehmedovi najbliži članovi porodice, kćerke i zetovi: „Zaista sam zadovoljan i sretan što sam ovu radnju prepustio njima, jer ovaj posao rade sa istim žarom, ljubavlju i strašću kao što sam i ja, i zbog toga imaju moju punu podršku“. U pekari danas radi 21 stalno zaposlena osoba i u funkciji je 365 dana u godini, a Poričanin se nada da će i budući naraštaji ostati u ovom poslu, od kojeg se može dobro živjeti, ali uz veliki i predan rad.

## Ulaganje u turizam

I pored očite mogućnosti da širi posao i otvara nove radnje po gradu, ali i šire, Mehmed Poričanin se ipak nije odlučio za taj potez: „Mišljenja sam oduvijek bio da je najbolje ostati u ovim okvirima, jer se fino živi, a to savjetujem i svojoj djeci. Otvaranje drugih pekara nikad nije bio moj izbor, ali zaista ne znam šta će biti njihova konačna odluka“. Ipak Mehmed je odlučio otvoriti hotel na Kovačima i tako podržati svog unuka, koji odranije pokazuje afinitete za bavljenje turizmom i hotelijerstvom.



*Pekara radi 365 dana u godini*



*Brojne pekarske delicije*

# Staro Sarajevo

Piše: **MUFID GARIBIJA**, sarajevski arhitekta

## Sahat kula

**U** osmansko doba samo su imućniji građani mogli si priuštiti mehaničke satove. Zato je u svakoj značajnijoj čaršiji postojala sahat-kula. Visoki toranj sa satom bio je vidljiv iz cijele čaršije. U pročelju imareta, u sklopu vakufa (zadužbine) Gazi Husrev-bega i danas stoji sarajevska Sahat kula. Građena je od kamena sedre, prvobitno je bila nešto niža nego danas. Stari sahat imao je samo jedan brojčanik, okrenut ka Gazi Husrev-begovoj džamiji. Na vrhu četverovodnog krova stajao je alem sa tri jabuke.

### Sahat kula stradala u Eugenovoj paljevini

**S**ahat kula je stradala u Eugenovoj paljevini Sarajeva 1697. godine, ali je ubrzo popravljena, a dodan je i novi sat. Na mjesto starog sata podsjećaju i danas masivna željezna vrata.

O kuli i satu kroz vrijeme su brinuli muvekiti (matematičari – astronomi) i sahadžije. Oni su na četiri brojčanika namještali (kurisali) sat kako bi ga udesili po islamskom računanju vremena (ala turka).

**O**vo je jedini sat u Evropi koji još uvijek funkcionira na tom principu. To znači da je početak dana u vrijeme zalaska sunca i tada kazaljke trebaju pokazivati 12:00. Da bi se sat održavao na taj način neophodno je da zaduženi svakodnevno „riktaju“ sat. Za te potrebe je Gazi Husrev-beg u blizini svoje džamije i sahat-kule napravio i sahatanu.

Prvi put u historiji ova sahatana se spominje 1604. godine. U njoj je tada radio sahadžija, brinući se o satu u sahat-kuli i objavljivanju vremena za namaz. Sahadžije su kasnije izvršavale sve složenije zadatke izrade preciznih kalendara, pa se iz sahatane razvila muvekithana, u to vrijeme moderna ustanova za astronomska mjerenja i određivanje položaja Mjeseca.

### Sahat dopremljen iz Londona

**M**uvekithana je sagrađena u haremu Begove džamije, izgrađena je od kamena i ćerpića te je prekrivena olovom. Lučni prozori s demirima okrenuti



su ka haremu i ulici Sarači.

**V**rata modernizaciji muvekithane otvorena su nakon reformi Omer-paše Latasa, pa je već 1858. godine Fadil-paša Šerifović naredio obnovu zgrade i dao novac za nabavku nove opreme za astronomska mjerenja. Nabavljeni su satni mehanizmi, rub-tahte, kvaderi, astrolabi, sesktanti, kao i dva globusa - Zemlje i nebeskog svoda.

Najvažnija rekonstrukcija same sahat-kule desila se 1874. godine kada je dograđen dio za smještaj novog sahata, čime je dobila visinu od 28 metara. Iste godine su po sahat u

London išli Hašim-aga Glođo i Mustafa Hadžikapetanović.

**N**ovi sat funkcionira i danas, a njegove kazaljke od mesinga na crnoj podlozi pokazuju na 12 arapskih brojeva. Sat je imao i zvona koja su oglašavala tačno vrijeme. Zvona od olova izrađivale su zanatlije poznate kao zildžije.

Nekada je u Sarajevu bila privilegija građana da se popnu do sata zajedno sa sahadžijom, pa čak i da tamo iftare u vrijeme ramazana. Tu čast su imali oni koji su pomagali Vakuf, taj običaj se više ne upražnjava.

# Ruže za članice Centara za zdravo starenje i unapređenje zdravlja

Načelnik Općine Stari Grad Ibrahim Hadžibajrić posjetio je 08. marta Centar za promociju i unapređenje zdravlja i Centar za

zdravo starenje Općina Stari Grad i Centar, gdje je svim damama poklonio ruže i čestitao Međunarodni praznik žena.

